

*Kaiser Friedrich III. fordert die im Konfliktfall zwischen Georg Boss von Maienfeld und **Ulrich von Brandis** das Urteil festgelegten Spruchleute u.a. **Albrecht Neger** und **Hans Spiegel** von **Vaduz** auf, zu der von Georg Boss vorgebrachten Klage gegen das erfolgte Urteil Stellung zu nehmen.*

Konz.: TLA, Sigmundiana XIVa – Pap.

Regest: LUB II (cg) n. Thommen V, Nr. 18, S. 15

Druck: Thommen V, Nr. 18, S. 15.

Am linken oberen Rand: Citatio Georgen | Boss

a) Embitten¹ vnsern vnd des Reichs² getrewen Burckarten von Reichen- | bach³, Ruschman Kilchmutter, Leonharden Müllner, Hannsen | Buchter, Hannsen Nagel, Wolffen Ort, Matheusen Yllion, | Wilhelmen Faczerin, Heinrichen Wolff, Rudolffen Kremel, | Cristan Schuehmacher, Josen Witter, Petern Hew, Petern | Spiner, Hannsen Ritz vnd Gebhardten Kuster, all in der herrschafft | Mayenfeld⁴ gesessen, auch amman Pauli zu Wallgew⁵, | Albrechten Neger vnd Hannsen Spiegel zu **Faducz**, Clausen | Ger vnd Küry Guck zu Sanagaza⁶, Hannsen Koch | vnd Hannsen Vischer zu Ragaz⁷, ^{b)}-Cristan Ammann, richter zu Malanz^{8--b)}, Hannsen Sneider vnd | Balthazarn Lena daselbs, Jann Dept zu Grusch⁹, | Dyss Warnier zu Fideris¹⁰, Jacoben zu Suss¹¹, Symon Brader | auf Thafass¹² vnd Petern Sprecher zu Zuczers¹³ vnnser | gnad vnd alles gut. Vnns hat vnnser vnd des Reichs | getrewer Geörg Boss von Mayenfeld mit clag fürbracht, | wiewol er ettlichen irrung, spenn vnd zwittracht halben, | so sich zwüschen dem edeln vnnsern vnd des Reichs | lieben getrewen **Vlrichen von Brandis**¹⁴ eins vnd im des | andern teils ^{c)}-haltinnd, mit ettlichen vnderschiedlichen | wortten zu gütekeit auf | euch verteidigt | vnd ir im zugesagt | nicht ferrer, dann auf | dieselben vnderschiedlichen wort zu sprechen, so hett ir doch weiter | vnd anders, dann er sich auf euch begeben, einen vermeinten spruch getan, | dardurch er seiner eren verletzt, vnd in merklichen schaden gefurt worden^{c)} || vnd deshalben clag sprüch | vnd vorderungen zu euch haben vnd rechtens notturfftig | sey, vnd vns diemuticlich angeruffen vnd gebetten, | ime des gegen euch gnediclich zu gestatten. Wenn | wir nü nyemands rechts versagen sollen, darumb | so heischen vnd laden wir ewer yeden besonnder, so | mit disem vnsern briue, oder glaublicher abschrift dauon | ersucht wirdet, auch ernstlich gebiettennde, daz ewer yeder auf | den XLV tag den nechsten, nachdem im diser vnnserer brief | oder glaublich abschrift dauon geanntwurt oder verkündt | wirdet, der wir euch XV für den ersten etc. dem vor- | genannten Geörg Boss oder seinem volmechtigen anwald zu | der oberurten seiner clag im rechten enndtlich zu anntwurten. | Wann ir komet vnd erscheinet alsdenn also oder nit, | nichts destmynder wirdert auf des gehorsamen teils oder seines | anwalds anruffen vnd verordnung im rechten volfaren

vnd | procedirt, als sich das nach seiner ordnung geburt. Darnach || wisset euch zu richten. Wir haben auch dem obge- | nannten Georg Boss den gemelten sachen vnd rechten, | auch darzwischen andern seinen sachen vnd geschefften | in dem Heiligen Reich allenenthalben sicher aufzuwartten, | zu hanndlen vnd zu wandlen, vnns vnd des Heiligen | Reichs gestracks freys siherheit vnd gleit gegeben Vnd | geben im das also von Romischer kuniglicher macht wissentlich | in crafft vnd von dato diss briefs ein gannczes | iar lanng werend. Darnach wisse sich ewer yeder | vnd meniclich zu richten. Datum Wien¹⁵, am | VI tag Nouembris anno etc. LXXX, kaiser 29

a) *Initiale E xx cm.* – b)–b) *Ergänzung links vom Text.* – c)–c) *Ergänzung links und unter dem Text.*

¹ Friedrich III., König, Kaiser, *1415-†1493. – ² Heiliges Römisches Reich. – ³ Burkhart v. Reichenbach (Richenbach), 1468-1480 Vogt v. Maienfeld. – ⁴ Maienfeld, Stadt, GR (CH). – ⁵ Walgau, Vorarlberg (A). – ⁶ Sargans, Stadt u. Bez., SG (CH). – ⁷ Ragaz, Bad, Gem., SG (CH). – ⁸ Malans, Gem., Kr. Maienfeld, GR (CH). – ⁹ Grüsch, Gem., Kr. Schiers, GR (CH). – ¹⁰ Fideris, Gem., GR (CH). – ¹¹ Susch (Süs), Gem., GR (CH). – ¹² Davos, Gem. u. Kr., GR (CH). – ¹³ Zizers, Gem., GR (CH). – ¹⁴ Ulrich v. Brandis, 1452-†1486. – ¹⁵ Wien, Stadt (A).